

四庫全書

集部

欽定四庫全書

集部

御訂全金詩增補中州集卷七十一

詳校官中書_臣張虎拜

主事銜_臣徐以坤覆勘

總校官編修_臣王燕緒

校對官編修_臣勵守謙

謄錄監生_臣黃嘉績

欽定四庫全書

御訂全金詩增補中州集卷七十一

元好問九

楊祕監馬圖

大青小青天馬姿
楊侯房星非畫師
忽見奚官記前事
東華馳道晚涼時

竹溪夢遊圖

意外荒寒下筆親
經營慘淡似詩人
何時萬頃風烟裏

白髮刁騷一幅巾

樂正卿餉酒

宿醒未解渴生塵
驚見王弘餉酒人
獨恨文書困佳客
不來同醉五更春

王都尉山水

平林漠漠數峯閒
詩在巖姿隱顯間
自是秦樓畫眉手
不能辛苦作荆關

贈絕藝杜生

迢迢離思入哀絃
非撥非彈有別傳
解作江南斷腸曲
新聲休數李龜年

趙大年秋溪戲鴨二首

寒沙折葦浙江灣
詩在波痕滅沒間
前日扁舟人老矣
却從圖畫羨君閒

畫家朱粉不到處
淡墨自覺天機深
賣酒壚邊見崔白

王孫真有五湖心

米元章畫史趙昌王友崔白但可為酒家遮牆壁耳

自題二首

共笑詩人太瘦生
誰從慘淡得經營
千秋萬古迴文錦
只許蘇娘讀得成

千首新詩百首文
藜羹不糝日欣欣
鏡中自照心語口
後世何須揚子雲

北歸經朝歌感寓三首

南來山勢漸坡陀
蕩蕩川涂接大河
馬上哦詩無好語
聊從白塔記朝歌

黃屋何曾土作階
禍基休指九層臺
書生不見千秋後

枉為君王泣玉杯

墨翟區區不近情
迴車曾此避虛名
采薇唯有西山老
不逐時人信武成

內黃道中
楚王廟
荆公有誰合
軍中稱亞父
却須推讓內黃兒
之句因為范增解嘲

一怒屠城一說留書生
剛為范增羞軍中老子闕何事
付與兒曹調沐猴

題蘇氏寶章

二老風流有典刑諸郎蘭玉映階庭
我媚寶氣千年在

未數陳家聚德星

長公忠義似顏平原次公冲澹似林西湖故字畫有不期合而合者最後

數帖所謂蘇氏三虎叔黨為最怒耳

劉氏明遠庵三首

豪氣元龍百尺樓功名場上早抽頭
路人不識閒居士袖手雍容活兩州

世間無物礙虛空宴坐經行一體同
老眼不應隨境轉江山元只在胸中

落落雲間晚照開上方別有妙高臺栽花種柳明年了
拄杖敲門日日來

題李庭訓所藏雅集圖二首

萬古文章有至公百年奎壁照河東衣冠忽見明昌筆
更覺昇平是夢中

景星丹鳳一千年合着丹青與世傳誰畫風流王李郝

大河南望淚如川

王謂仲澤李謂
長源郝謂仲純

馬坊冷大師清真道院二首

水際茅齋星散居白雲閒伴五溪魚茂林修竹山如畫
蘸碧軒中恐不如

靜中人境兩翛然我亦因君有靜緣已約青山來枕上
水亭風榭看明年

惠崇獐猿圖

月嘯烟呼本不羣筆頭同是一溪雲野情山態令人羨
世路機關不似君

寄史同年二首

情話通宵慰別離
殷勤釀酒趁花期
沁南只道梅花早
猶較歸程十日遲

相君許送買山錢
晚歲隣居定有緣
一樹梅花一罇酒
知君東望亦悽然

宋周臣生子三首

試手君家助喜詩
秋風丹桂長新枝
昂霄聳壑他年見
木月同宮記此時

木月同宮五星家謂人
以此時生者長必貴

玉季金昆世共賢
天將大筆付家傳
清新未要梅花賦

射虎留看第二篇

鄉先生宋濟川
以射虎詩著名

雛鳳來時鶴卵成
兩兒前後不多爭
阿寧解語應須道
猶是渠家百日兄

乞酒示皇甫季貞

醉頭慵舉睡昏昏
夢裏青旗雪擁門
枕上一杯風味好
糟牀何處得茶渾

李白騎驢圖

八表神遊下筆難
畫師胸次自酸寒
風流五鳳樓前客

枉作襄陽雪裏看

許由擲瓢圖

不知黃屋不知堯
喧寂何心計一瓢
我是許由初不爾
只將盛酒杖頭挑

九月晦日

松楸千里動悲哀
說道回家早晚回
九月忽驚今日盡
滿城風散紙錢灰

雜著

燒錢芻狗不能神一色貂裘繡帽新好箇路傍官堠子
經年端坐看行人

送窮

送君君去欲何之暫去還來也不辭但媿苦無相贈物
柳船輕似去年時

即事

四長東州貢姓名阿茶能誦木蘭行元家近日添新喜

掌上寧兒玉刻成

寧兒叔開小字阿
茶第四女字叔開

侯相公所藏雲溪圖曾命賦詩三首但記其一云
祖道東門未有涯田君方駕入宮車祗應千古狼
溪路人說山中宰相家相公以體重不任步趨詔
許駕小車至朝殿外門故予詩及之北渡後往東
平路經雲溪因為之賦

黃山圖子翰林詩千里東州有所思前日相公門下客
國亡家破獨來時

陳德元竹石二首

一片春雲雨未乾
兩枝新綠倚高寒
瘦龍不見金書字
試就宣和石譜看

萬石網船出太湖
九州膏血一時枯
阿誰種下中原禍
猶自昂藏入畫圖

同漕司諸人賦紅梨花二首

梨花曾比太真妃
別有風流一段奇
白雪為肌玉為骨
淡妝濃抹總相宜

瓊枝玉蘂靜年芳
知是何人與點妝
可道海棠羞欲死

能紅能白更能香

吳子賢樗庵二首

人道樗形百醜全
我知造物向君偏
世間正有明堂柱
偃蹇風霜得幾年

廣莫初無匠石過
一丘一壑奈君何
世間正有明堂柱
春草輸贏較幾多

太乙蓮舟圖三首為濟源奉先老師賦

老師吾宗盟

泠泠風外列僊臞
琢玉羊欣定不如
六合空明一蓮葉

更須遮眼要文書

仙人在蓮
禁臥看書

仙人寧得此婆娑
亡奈丹青狡猾何
我與太虛同一體
也無蓮葉也無波

太乙青藜出漢年
明窓開卷一欣然
憑君莫問題詩客
不是韓駒第二篇

遊天壇雜詩八首

只願長城沒微頭
豈知蒸土更堪憂
秦人若見千年後

抱杵臨洮老死休

避秦
溝

仙貓聲在洞中聞憑仗兒童一問君同向燕家舐丹鼎

不隨鷄犬上青雲

仙貓洞是日兒子叔儀呼貓應者上人傳燕家鷄犬升天貓獨不去

諸峯羅列擁朝臺落日行雲一望開絕似泰山山上看
分明齊嶺是徂徠

空翠霏烟海浪深鰲頭鵬背半浮沉不知脚底山多少
還盡平生未足心

道民終不忘天台姓字依然在蜜崖為問松臺千歲鶴

白雲何處不歸來

近歲盧氏蜜崖人迹不及處有題字云道民天台司馬承禎過松臺即白

雲老
葬地

仙人龍蹻玉為鞭石穴留書世不傳弱水蓬萊三萬里

青山今古幾何年

近年人有得司馬先生石穴所藏丹經予獲觀於山陽

風期身後復身前一讀丹華似有緣八表神遊吾豈敢

或能搖筆賦垂天

擬着茅齋北斗平殘年細讀洗心經詩成應被盧仝笑

曾見青山養伯齡

盧仝送伯齡出山云伯齡不厭山山不養伯齡予以旱當出山故自戲云

北斗平在天壇之後

初發潞州

潞州住久似并州身去心留不自繇
白塔亭亭三十里
漳河東畔幾回頭

雜詩六首道中作

鼠肝蟲臂復何辭坎止流行亦有時
已被吳中喚僮父
却來河朔作炎兒

隆州兵騎往來衝客路灰郊更向東
大似天教浣塵土
數程都在水聲中

懸崖飛瀑駭初經白玉雙龍擊迅雷却恨暑天行過速
不曾赤腳踏清冷

黃華北下馬陵南佛屋燒殘有石龕想是故鄉行欲近
粥糜渾覺水泉甘

莊休通蔽互相妨鄉社情親豈易忘司命果能還舊觀
髑髏端合羨侯王

鄉關白日照青天徒步歸來亦可憐袖裏新詩一千首
不愁錦繡裹山川

初挈家還讀書山雜詩二首

并州一別三千里
滄海橫流二十年
休道不蒙稽古力
幾家兒女得安全

乞得田園自在身
不成還更入紅塵
只愁六月河堤上
高柳清風睡殺人

贈羅友卿三首

一般華木各榮枯
筦庫區區亦仕途
前日江東羅給事
只今城裏范萊蕪

不離城市得幽棲
未要坊名改碧雞
種下五株桃樹子
本無心學浣花溪

閒中日月病中身
寂寞相求有幾人
莫怪門前可羅雀
詩家所得是清貧

又解嘲二首

鴈後花前日月閒
頗思罇酒慰愁顏
憑君細數東州客
誰在花花綠綠間

詩卷親來酒醖疎
朝吟竹隱暮南湖
袖中新句知多少

坡谷前頭敢道無

為衍聖孔公題張公佐湘江春早圖二首張自書
云涂水張公佐畫時年八十一先大夫嘗題公佐
畫有雲靜洞庭秋寺月雨昏湘浦夜船燈之句因
及之

郭熙畫筆老益壯未比并州九十翁想是江南春夢裏
水村曾見酒旗風

黃陵祠下雨如繩老筆題詩想舊曾今日圖間見晴景

依然愁絕夜船燈

渾源望湖川見百葉杏花二首

四月山泉凍未開東君纔為挽春迴多情丹杏知人意
留著雙華待我來

兒時憶向西溪廟丹杏曾看百葉花今日山中見雙朶

自憐顚顚老天涯

陵川西溪二仙廟有
百葉杏兩株在殿前

代州門外南樓二首

東洛西秦往復迴幾番風雨與塵埃家山最與南樓近

三十三年恰再來

汀樹微茫岸草青
滹河四月水泠泠
鳳山可是生來巧
堪與南樓作臥屏

以玉連環為呂仲賢壽

玉環何意兩相連
環取無窮玉取堅
願得主人如此物
呂翁他日作回僊

劉壽之買南中山水畫障上有朱文公元晦淳熙
甲辰中春所題五言得於太原酒家

蜀山青翠楚山滄愛玩除教寶繪堂且道中州誰具眼
晦庵詩挂酒家牆

紫微劉尊師所畫山水橫披四首

劉時年
八十六

納納溪橋逗晚風水村山郭往來通馬蹄踏遍黃塵路
畫裏初逢避俗翁

胸次江山老更奇太初元氣入淋漓仙翁不是人間客

俗筆休將比郭熙

溪橋
獨步

瓦盆濁酒憶同傾鄉社豐年有笑聲世外華胥誰復夢

且從圖畫看升平

江亭會飲

筆頭雲景性中天誰似仙舟有靜緣只合此間添此老

脫巾和月弄江烟

秋江待渡

東山四首

半欲天陰半欲晴層巒疊嶺各分明去年風雪無多景
看盡東山是此行

自笑平生被眼謾看山只向畫中看天公老筆無今古
枉着千金買范寬

錦里春光風馬牛鳥飛不到太湖秋一丘一壑都堪老
且具神山烟景休

馬水橫陳聖阜前溥沱陂堰遠相連魚多只說牛家滙

何處秋風有釣船

牛家滙在
神山下

曉起

鬢毛衰颯病凌兢暫入紅塵倦不勝學似玉山樵客了

八年流落醉騰騰

予痛飲至是八年
故用韓致光此句

追錄乙未八月十七日莘縣夢中所得

夢裏哦詩信口成分明濟水道中行夢迴真到哦詩處
滿馬西風雲月清

感興四首

夢中驚見白頭新信口成篇却自神天上近來詩價重

一聯直欲換青春

後二句夢中所得

詩印高提教外禪幾人針芥得心傳并州未是風流減
五百年中一樂天

廓達靈光見太初眼中無復野狐書詩家闕捩知多少

一鑰拈來便有餘

好句端如綠綺琴靜中窺見古人心陽春不比皇華曲
未要千人作賞音

從孫顯卿覓平定小山

愛殺熙春萬玉峯網船迴首太湖空一拳秀碧烟霞了
早晚東山入袖中

墨竹扇頭

嫩香新粉玉交加小筆風流自一家只欠雪溪王處士

醉來肝肺出枯槎

王希古乞言

夫幹空虛不救貧素衣空染洛陽塵一龜早晚堵牀了
袖手風簾閱市人

龍門公墨竹風烟夕翠二首

渭川東望水雲寬雨潤烟濃下筆難今日龍門圖上看
蕭郎只合老荒寒

烟梢露葉捲秋山揮灑縱橫意自閒莫問筆頭龍未化

看看霖雨滿人間

從希顏覓篤耨香二首追錄

綠洋奇品賽濃梅永憶薰爐試淺灰尤物也知人愛惜

簾篩風動只縈回

自倚詩情合得消暮寒新火覺無聊懸知受用無多在
試往新詩乞斷瓢

戲贈柳花

誰擘輕綿亂眼飄不教翠組綴長條只愁更作浮萍了

風捲波衝去轉遙

喬夫人墨竹二首

萬葉千梢下筆難一枝新綠儘高寒不知霧閣雲窓晚
幾就扶疎月影看

只待驚雷起蟄龍忽從女手散春風渭川雲水三千頃

悟在香巖一擊中

夫人參洞
山禪有省

醉貓圖二首何尊師畫宣和內府物

窟邊癡坐費工夫側輓橫眠却自如料得仙師曾細看

牡丹花下日斜初

飲罷雞蘇藥有餘
花陰真是小華胥
但教殺鼠如丘了
四脚撩天一任渠

藥山道中

石岸人家玉一灣
樹林水鳥靜中間
此中未是無佳句
只欠詩人一往還

善應寺五首

平岡回合盡桑麻
百汊清泉兩岸花
更得青山作重複

武陵何處覓仙家

石潭高樹映寒藤
閒有沙鷗靜有僧
總愛山陽竹林好
七賢來了更誰曾

夕陽人影臥平橋
倦客登臨不自聊
且放游魚覓歸宿
爭教白鷺逞風標

山中魚鳥夙相親
問舍求田有主人
自讀舊題還自笑

七年鞍馬只紅塵

前題善應寺壁有紅塵鞍馬幾時休之句又七年矣

困不成眠百感生
田家燈火夜深明
無因洗耳風沙底

枉費潺潺落枕聲

摘爪圖二首 樗軒家物

四摘空留抱蔓詩
阿婆真作木腸兒
履霜只說琴心苦
不見房陵道上時

高鳥長憂挂網羅
如庵日月共消磨
憑君莫話前朝事
比似黃臺摘更多

黃華峪五絕句

樹經凍雨半青黃
山入高秋老更蒼
且就同游盡佳客

不妨五日未重陽

紅葉黃花風露清
比來春色不多爭
秋山却也堪人恨
白與高歡作錦城

萬古飛流瀉不供
枉教噴薄困魚龍
謫仙剩有銀河句
不道香爐更一峯

天漢何因有蚌胎
無窮水電落懸崖
只愁馳背模糊錦
翻倒龍宮復此來

乞得三泉住不成
風沙鞍馬負平生
故山定已移文了

又被黃華識姓名

七賢堂

水上盤陀不見人烟中白露玉無塵竹林未恨風流減

負殺共城麴米春

是日有餉名酒獨酌水邊

峽口食鰻魚有感

無奈微雲疎雨何孟公詩律費研磨憑君莫愛襄陽好

縮項鰻魚刺鯁多

簡之畫松風圖為修端卿賦二首

董元老筆鬱盤盤萬壑蒼雲復此看絕似鳳凰山下路
秋風無際海波寒

新亭相泣血沾襟一日神州見陸沉好就崆峒山叟問
醉眠春晝果河心

秋江待渡橫披

物外琴尊合往還爭教俗駕點溪山畫師果識閒中趣
只作橫舟落照間

贈答要襄叔二首

長洲連日遠相迎展讀新詩眼倍明
鄧下舊人多念我感君兼有故鄉情

丈擬邱侯下筆難韜春一讀不知寒
名家未覺風流減

洗眼青雲看阿端

襄叔之先人擬下邱侯傳作竇韜春以賦火焙又其兒子小字端平方就

學

贈修端卿張去華韓君傑三人六首

姓字舊熟相知新三子皆我眼中人
洛西荒山有此客酒光灑灑梅花春

去華手中倒樹棚亦要筆力挽千鈞知君辦作南山豹
霧雨七日蔚成文

掃地焚香樂有餘情知怏怏米鹽書枉教棄擲泥塗了
綠髮修郎玉不如

古來馬隊非講肆韓生頗似周生勤舉家都無擔石粟
老氣仍有垂天雲

中庸胡公隔天壤

寶臣近
日客死

大木失望工師來明堂老手

李明府我知此公無棄材

謂李順
陽吉甫

乳虎守穴子可探
斫頭不屈貧所甘
異時三客俱燭焰
人倫東國吾無慚

秋江曉發圖

百轉羊腸挽不前
旂車轆轤共流年
畫圖羨殺扁舟好
萬里清江萬里天

題山亭會飲圖二首

女兒樵人塞上詞

劉景玄號

溪南老子坐中詩
因君喚起山

亭夢好似三鄉共
醉時

曾將心事許烟霞
酒榼書囊便是家
前日山亭亭上客
而今鞍馬老風沙

洛陽衛良臣以星圖見貺漫賦三詩為謝

敗筆成丘死不神
侯門書卷欲誰親
鰥鰥魚目漫漫夜
盼到明星老却人

參旂亦自遇災年
橫被狐星射右肩
牽牛只有樗機石
送與天公折聘錢

西虎東龍總伏雌
老蟠却是可憐兒
星圖何物堪相報

藉用盧仝月蝕詩

題鷺鷥敗荷扇頭

荷經凍雨綠全枯
葦到窮秋影亦疎
為問風標兩公子
此中能幾多魚

西山樓為王仲理賦二首

天日清明四望開
樓中舒嘯亦悠哉
闌干十萬人家裏
只有青山入眼來

拄笏西山老騎曹
朝來爽氣與秋高
休將人物輕題品

湖海元龍興未豪

樂天不能忘情圖二首

得便宜是落便宜木石癡兒自不知
就使此情忘不得可能長在老頭皮

芙蓉脂肉紫霞漿別是仙家煖老方
只枉柳枝拚不得忘情一馬亦何妨

燕省掾屬張彥通舉釋菜之廢典
仁卿以詩美之亦賦二詩

一奠區區入詠歌請看文治竟如何李侯落筆非無意
告朔羊存得已多

一日新儀見泮宮共驚綿蕞有遺風他州亦可燕中比
只在今無百彥通

采菊圖二首

信口成篇底用才淵明此意亦悠哉枉教詩景分留在
百繞斜川覓不來

夢裏烟霞卜四隣爭教晚節傷風塵詩成應被南山笑

誰是東籬采菊人

無塵亭二首

霧廓雲開病未能
波流草靡亦何曾
胸中自有西風扇
身外休論有髮僧

日日門前車馬喧
玉壺冰簟酒如川
亭中剩有題詩客

獨欠雲間李謫仙

時仁卿尚未到燕

李廣道寫真二首

華髮蕭蕭玉鍊顏
一篇秋水想高閒
須知八表神遊客

不在披裘擁絮間

擁絮披裘動數千
肉身那得盡飛仙
玄門此老留教在
滄海橫流未必然

錢過庭烟溪獨釣圖二首

鞍馬風沙萬里身
眼明驚見楚江春
綠蓑衣底玄真子
不解吟詩亦可人

小景風流二百年
典刑來自米家船
詩人無復承平舊

重為遺音一慨然

畫學米元章楚山
清晚故有上句

蒼崖遠渚圖二首

深谷高林自一天紅塵無路近風烟兩椽茅屋平生了
況是清溪有釣船

竹帛功名一筆無殘年那復計榮枯青山未得攜家去
惆悵題詩是畫圖

三士醉樂圖

依樣胡盧畫不成三家兒女日交兵瓦盆一醉糊塗了
比似高談却較爭

鄉郡雜詩三首

余家自五代以後自汝州遷平定宋末又自平定遷於忻故大字中

以平定

為鄉郡

百年喬木鬱蒼蒼耆老風流趙與楊為向榆關使君道

郡中合有二賢堂

楊吏部之美臯落人閒閒曾守此郡

神仙官府在瀛州何意閒閒得此留莫笑山城小於斗

他州誰有湧雲樓

樓閒閒所建

故鄉飛鳥亦裴徊更覓何鄉養不才見說陽泉好春色

野夫乘興欲東來

宗人明道老師澹軒二首

潞人澹社有來源濟水分流到澹軒莫問軒中賓與主
一家同是潞州元

淡中無味着鹹酸老口年多不受謾流外已曾增一輩
不妨傳法到黃冠

題商夢卿家晦道堂圖二首

松亭竹閣數家村通德仍餘舊里門喬木未須論巨室

青衫今

一作誰

有讀書孫

東國人門幾百年素風繞到此公傳卷中甚欲題詩句
慚愧韋家祖德篇

商正叔隴山行役圖二首

隴坂經行十過春也隨風土變真淳吳山沂水不必畫
留在秦音已可人

夢中陳迹畫中詩前日行人鬢已絲我亦寒亭往來客
因君還寄出關詩

息軒秋江捕魚圖三首

擲網牽罾太俗生烟波名利不多爭綠蓑衣底玄真子
可是詩翁畫不成

擊甕喧天網截河得魚何啻一罾多漁郎不作明年計
奈此纖鱗細甲何

正始風流一百年竹谿衣鉢有真傳玉堂人物今安在
紙尾題詩一慨然

東平李漢卿草蟲卷二首

蟻穴蜂衙筆有靈就中秋蝶最闌情知君夢到南華境

紅穗碧花風露清

過眼千金一唾輕畫家元有老書生草蟲莫道空形似

正欲爾曹鳴不平

李資高元視錢幣如糞土貴人求畫或大罵而去故不與世合

郭熙溪山秋晚二首

烟中草木水中山筆到天機意態閒九十仙翁自游戲
不應辛苦作荆關

雲樹微茫石崦開吳兒洲渚不塵埃憑君記取題詩處
杖履適從硤谷來

七賢寒林圖

萬古騷人有賞音
畫家滿意與幽尋
題詩記取松前事
絕似馮雷入少林

右丞文獻公著色鹿圖

野鹿標枝氣象閒
老皇頻歲赦秋山
不妨右相丹青筆
時到霜林紫翠間

李仲華湍流高樹圖二首

細密功夫足自神
經營慘澹欲誰親
却應林影湍聲外

猶欠吳山小筆春

小景風流恰入時留題紙尾竟何辭不因脫兔投林了

何處而今更有詩

癸巳正月之變逆黨中有欲謀害已者賴仲華力為營護得釋故篇末有

及

益都宣撫田侯器之燕子圖詩傳本已亥秋七月

予得於馮翊宋大通家會侯之子仲新自燕中來

隨以歸之仲新謂予言兵間故物一失無所復望

乃今從吾子得之煥若神明頓還舊觀似非偶然

者方謁時賢以嗣前作幸吾子發其端因賦三詩
紅綫還驚掌上看十年音信海漫漫渠家王謝堂前慣
暗認曹劉可是難

古錦詩囊半陸沉吳楓句好入江深世間妾婦爭相妬

禽鳥區區却賞音

首句謂怨家投
李長吉詩刪中

才氣田侯絕世奇山丘零落更堪悲休驚燕子詩留在
化鶴歸來未可知

前高山雜詩六首

夢寐烟霞卜四隣
眼明今日出紅塵
山中景趣君休問
谷口泉聲已可人

山經地志總難憑
鄉社留傳太俗生
前後兩高從我改
合教松海作新名

蚊聚蛙喧杳不聞
已甘麋鹿與同羣
胸中所得知多少
半是青松半白雲

世上初無物外緣
人間却有洞中天
如何常伴王居士
買盡青山不用錢

白驢前日鳳山迴為愛朝元復此來却憶廣陵劉老子
醉吟應在釣魚臺

白首同歸未省曾青山獨往竟誰能莫嫌麋鹿無情識
比似人間少愛憎

題石裕卿郎中所居四詠

寓樂堂

此心安處是真歸念念今知故習非一首新詩一杯酒
五陵裘馬自輕肥

德恒齋

養心如虎亦良勤
血戰紛華老策勲
百草千花過春雨
白衣蒼狗看浮雲

雪巖

貞松勁柏四時春
霽月光風一色新
置屋懸崖儘堪老
層冰千里只愁人

聾齋

弓刀陌上未知還
心寄漁郎笠笠間
名作聾齋疑未盡

崑山衣鉢在遺山

贈李子範家兒子

神理乘除不偶然只疑陽報向君偏
試評掌上明珠價幾倍諸家覓藥錢

跋文獻公張果老圖

耆舊能談相國賢功名欲占冷巖前
清風萬古猶應在未用仙公甲子年

三鄉雜詩一首

溪南老子坐詩窮窮到簞瓢更屢空五鳳樓頭無手段
碧雞坊外有家風

釣州道中

野陰莽蒼日將夕歲律崢嶸風有聲從昔南山歌短褐
何時北闕請長纓

十月二十日雪

和氣休論歲欲豐且看蕪穢一時空臨高賞雪人何限
誰在瓊瑤世界中

哭曹徵君子玉

去歲流言到處疑
聞君哭我不勝悲
今年我在君先沒
淚盡荒城君得知

又

遶墳三匝去無因
千里冰霜半病身
斗酒隻雞孤舊約
素車白馬屬何人

二十六日早發安生道中雨水水

玉樹瓊林世界寬
木冰真作雨花看
青青也被糊塗盡

松栢何曾保歲寒

書貽第三女珍

珠園翠繞三花樹
李白桃紅一捻春
看取元家第三女
他年真作衛夫人

隱秀君山水為范庭玉賦

萬壑風烟入座寒
六銖仙帔想驂鸞
多少金閨畫眉手
吳山繞得鏡中看

送子微二首

老年鞍馬不勝勞更問狐裘與緼袍到了龍門有何好
伊川清淺石樓高

古來何物是經綸一片青山了此身亂後洛陽花木盡
不妨閒作水南人

雪行圖

太乙仙舟雲錦重新郎走馬杏園紅騎驢
鴈殺吟詩客到處相逢是雪中

寄杜莘老三首

夢裏雲山一臥屏先生畫筆果通靈不妨行樂長安市
纔是前生許道寧

一片青山共白雲春林烟景入晴曛祝君老眼明於鏡
毫末清妍子細分

盃酒殷勤興不孤更教懷袖得新圖綠囊自是君家物
醫得烟霞痼疾無

巳酉四月十七日度嶺

四海虛名值幾錢世間何限好林泉無情石嶺關頭路

行去行來又十年

劉君用可庵二首

末節繁文費討論經生規矩是專門惡惡不可惡惡可笑殺田家老瓦盆

着脚繩橋已足憂邯鄲匍匐更堪羞惡惡不可惡惡可大步寬行老死休

惡音鳥

耀卿西山歸隱三首

馬卿為耀卿張君寫真未幾被召北上

靜裏簞瓢不厭空北窓元自有清風傳巖只道無人識

已落君王物色中

馬卿似與物為春
難狀靈臺下筆親
預拂青山一片石
異時真是卷中人

冠劍靈臺大縣侯
當春漁釣一羊裘
山林鐘鼎無心了
誰是人間第一流

東丹騎射

意氣曾看小字詩
畫圖今又識雄姿
血毛不見南山虎
想得弦聲裂石時

虛名

虛名不值一錢輕
喚得呶呶百謗生
可惜客兒頭上髮
也隨春草鬪輸贏

投書圖二首

一束空書不療饑
浮沉隨水恰相宜
醬蒙藥楮輕拋却
却是洪喬見事遲

屈作書郵未肯心
百函隨水聽浮沉
虛名底用寒溫問
却是洪喬最賞音

題劉威卿小字難素冊後二首

仗道精微得處難
書林頭白一儒冠
陰功厚薄君休問
只就蠅頭細字看

齒牙餘論足輝光
東國人倫趙與楊
曾是兩公門下客
殘年袖手亦無妨

龐都運山水

門闌喜色到崔盧
文賦聲名逼兩都
重為溪山感疇昔
風流還有此翁無

歸義僧山水卷

崧少經行二十春
野麋山鹿盡情親
而今身落京塵底
畫出林泉亦可人

武善夫桃溪圖二章

物外烟霞卜四隣
武陵不是避秦人
軟紅香土君休羨
千樹桃花滿意春

金罽毳毳六月寒
桃花春夢隔征鞍
青山歸計何時辦
畫卷空留馬上看

巢雲曙雪圖武元直筆明昌名士題詠

風流人物見承平
半向巢雲有姓名
畫手休輕武元直
胸中誰比玉崢嶸

書扇贈李湛然

江楓搖落海門秋
江水無風月半樓
未要吳儂誇勝槩
已從詩境得天游

普照范鍊師寫真三首

嚮日神仙看地行
只今烟駕想雲程
石梁畫出西流寺

無復鏗然曳杖聲

傾蓋論交了歲寒
眼中人物似君難
流波意在誰真識
未絕朱絃已廢彈

鶴骨松姿又一奇
化身千憶更無疑
人間只說乘風了
覲面相呈却是誰

祖唐臣所藏樗軒畫冊二首

綠盡紅稀夢已空
草黃沙白思無窮
波間野鴨渾無賴

長著詩人慘淡中

敗荷
野鴨

牧笛無聲畫意工
水村烟景綠楊風
題詩憶得樛軒老

更覺升平是夢中

風柳
牧牛

和威卿鎬厲王故居

天道循環只眼前
果誰烈焰與寒烟
種瓜四摘渾閒事
抱蔓無人更可憐

走筆題十老會請疏

痛飲形骸百不成
天教鄉社送餘生
病夫近日添新喜
十老圖中有姓名

七夕

天街奕奕素光移
雲錦機閒漏箭遲
誰與乘槎問銀漢
可無風浪借佳期

馬雲卿畫紙衣道者像

太古清風匝地來
紙衣長往亦悠哉
鐵牛力負黃河岸
生被曹山挽鼻迴

歸義僧侍者溪山蕭寺橫軸

石磴雲松百八盤
東峯日上海波寒
老來丘壑風流減

却就禪房覓畫看

雲漢此畫甚有泰山典刑因記東峯看日出時故有上句

胡壽之待月軒三首

一幅清風竹寫生月華霜白紙如冰天公老筆無今古

枉却坡詩說石丞

愛竹髯參發巧新能教一影具形神千門萬戶清光裏
袖手東窓有幾人

形似何曾有定名每從遊戲得天成墨君解語應須道
猶欠風琴一再行

御訂全金詩增補中州集卷七十一

欽定四庫全書

御訂全金詩增補中州集卷七十二

元好問十

真味齋

麤飯寒釐老此身
高人那計甌生塵
味無味處君知否
道着琴書已失真

喬夫人彩繡仙人圖

彩服仙童畫不如
直疑萊子戲庭除
青紅未是春風巧

金少卿月公集
卷七十二
一頌椒花更有餘

出山像

不見恒星莫漫驚
日頭從此向西生
只知大事因緣了
依舊雲門望太平

超禪師晦寂菴

無波古井靜中天
三尺藜牀坐欲穿
一語詢君君莫笑
妙高峰頂更超然

自題寫真

東塗西抹竊時名一線微官悞半生
不畫幼輿巖穴裏野麋山鹿欲何成

贈寫真田生三章

人物翩翩美少年書生穎悟亦天然
燕南只道丹青好棄擲泥塗自可憐

萬態千形畫裏看人人睂目與衣冠
情知不是裴中令一片靈臺狀亦難

市井公卿萬

一作趣

不同依然見解一兒童張顛草聖雄

千古却在孫娘劍器中

贈高君用

君益仲弟

杏苑仙郎合探花
虛傳佳句滿京華
丁寧王謝堂前燕
大采風流有故家

周才卿拙庵

詩筆看君有悟門
春風過水略無痕
庵名未便遮藏得
拙裏元來大巧存

郭大方自適軒

自適還曾自適無半生枯寂坐禪居馬卿若也知人意
只畫梁家舉案圖

晴景圖

白日青天下筆難要從明潤細尋看藏山只道雲烟好
畫吏而今盡熱謾

金山

在忻口南

攢青疊翠幾何般玉鏡修眉十二鬟常着一峯烟雨裏
苦才多思是金山

單彥清飛雨亭橫披

百道懸流注夜光
畫中亭榭亦清涼
何人與問長安客
赤日黃塵有底忙

讀漢書

室方隆棟非難構
水到頽波豈易迴
豐沛帝鄉多將相
莫從興運論人才

內相楊文獻公哀挽三章白少傅體

征南諫疏無多語
大度高皇有至仁
留得青囊一丸藥

異時猶可活斯民

中臺啓事山吏部東閣詞臣何水曹松柏蕭蕭一丘土
龍門依舊泰山高

姓名三字金甌重事業千年片簡青
試向雲間望光彩
看從何地現文星

花光梅

草聖前頭一樹春豪華落盡只天真
寫生今向君家見
疑是花光有兩身

夏山風雨

慘澹經營有許功
吳僧誰得嗣宗風
情知一雨收晴了
更沒塵沙到坐中

春雲淡冶

一抹平林素練橫
數堆寒碧白烟生
春雲可是多姿態
五字韋郎畫不成

雪谷早行圖

卷中多國朝
名勝題詠

雪擁雲橫下筆難
爭教萬景入荒寒
詩翁自有無聲句

畫裏憑君細覓看

胡叟楚山清曉

剪得吳淞一片秋江山小筆也風流卷中未有題詩客
留待才情趙倚樓

辛亥九日未見菊花

黃菊霜華日日添也應有意醉陶潛鬢毛不屬秋風管
更揀繁枝插帽簷

答俊書記學詩

詩為禪客添花錦
禪為詩家切玉刀
心地待渠明白了
百篇吾不惜眉毛

臺山雜詠十一首

甲寅六月

登臨夙有故鄉緣
試手清涼第一篇
知被錢郎笑寒乞
不將錦繡裹山川

萬壑千巖位置雄
偶從天巧見神功
湍溪已作風雷惡
更在雲山氣象中

顛風作力掃陰霾
白日青天四望開
好箇臺山真面目

爭教坡老不曾來

山雲吞吐翠微中
淡綠深青一萬重
此景祇應天上
有
宜知身在妙高峰

兜羅綿界寶光雲
雲際同瞻化現身
解脫文殊俱有說
是中知有本強人
真向華嚴見化城
翻嫌金屑翳雙明
惡惡不可惡惡可
未要雲門望太平

總為毗耶口不開
龍宮華藏頓塵埃
對談石上維摩在

珍重天殊更一來

咄嗟檀施滿金田
遠客游臺動數千
大地嗷嗷因炎暑
山中多少地行仙

石罅飛泉冰齒牙
一盃龍焙雪生花
車塵馬足長橋水
汲得中泠未要誇

凜凜長松臥澗阿
提壺悲嘯撫寒柯
萬牛不道丘山重
細路沿雲奈爾何

熱惱消除佛作緣
山頭水雪過尖天
法王悲智無窮盡

更有清涼遍大千

跨牛圖

才子唐人冠服作哦
詩狀牛後帶琴書

畫出升平古意同
江村渺渺綠楊風
看來總是哦詩客

遠勝騎驢着雪中

隨駕張珪似
是摹古久本

贈湛澄之四章

眼花看碧漸成朱
兀兀陶陶樂有餘
柳岸醉僧堪一笑
強教分別竟何如

兒女團團麗行婆
漉簾活計苦無多
布囊歸去詩千首

猶欠庭珪墨一螺

十年不見山堂老
賴有澄之在眼中
總道木庵枯淡好
東風花柳各青紅

散聖風流有別傳
漆瞳一點出人天
石門故事君知否
好佐涪翁學刺船

三門集津圖

南北爭教限大江
吳家纔了又陳亡
畫工只說三門險
不記茅津一葦航

乙卯端四日感懷

衰年那與世相關苦被詩魔不放閒
好箇舊家長樂老無才無德只癡頑

山村風雨扇頭

總為詩翁發興新直教畫筆亦通神
莫嫌風雨無多景截斷黃塵亦可人

跋蕭師鷺鷥敗荷扇頭

徐榮之畫

蕭蕭烟景帶霜華公子風標浪自誇
可道浣花詩境好

鷓鴣鵲滿晴沙

袁顯之扇頭

雙鷺聯拳只辦愁
枯荷折葦更窮秋
風流綠影紅香底
好箇鴛鴦百自繇

贈司天王子正二首

慣見河邊織女機
枯槎八月未成歸
樓遲零落今如此
枉却星翁比少微

天容海色本澄清
萬古東方有啓明
七十七年強健在

不妨林下看升平

工部趙侍郎下世日作

鶴骨翛然臥石牀
情知合眼即仙鄉
安時處順吾儒事
枉却南華說坐忘

跋耶律浩然山水卷

六月三泉松桂寒
西風早晚送歸鞍
無因料理黃塵了
只得青山紙上看

貞燕

杏梁雙宿復雙飛海國爭教隻影歸想得秋風漸涼冷
謝家兒女亦依依

污潔難將一類推舊家紅綾可無疑豚魚自是詩家語
輕擬庭聞恐未宜

楊祕監雪谷早行圖

息軒畫筆老龍眠雪谷水橋自一天六月高樓汗如雨
豈知方外有詩仙

杜莘老夏日汾亭橫軸

杜侯老筆堯民意黃閣清風有故家庸俗紛紛小兒女
枉教塵土浣烟霞

武元直秋江罷釣

暮山明月曉溪雲今古仙凡此地分醉後狂歌問漁叟
殘年何計得隨君

張彥遠江行八詠圖

奉使時
所見

楚山平浸楚江流放眼江山得意秋一寸霜毫九雲夢
合教轟醉岳陽樓

題馮漕緩之碩人在澗橫軸

胡先生畫

見說雲霄意氣豪
幾迴攬鏡惜顛毛
不爭畫得林泉好
轉使山人索價高

題邢公達寒梅凍雀圖

褐衣相媚不勝情
只許乾暉畫得成
却被詩人笑寒乞
一枝風雪可憐生

隱秀君山水

鳥鞞踏破軟紅塵
未信溪山下筆親
圖上風烟看瀟灑

畫家亦有衛夫人

同梅溪賦秋日海棠二章

錦水休驚散綵霞
換根元自有靈砂
瓊枝不逐秋風老
自是人間日易斜

翠袖紅妝又一新
秋風秋露發清真
丹青寫入梅溪筆
桃李從今不算春

梁氏先人手書

玄蚪飛跳九天門
秦火驚看片紙存
耆舊風流知未減

青山還見讀書孫

薊北杜國寶以真定教官李進之所誤大父中憲
公及其先人帥府從事行狀見示用題三絕其後
總道清流解致君白袍唐日已紛紛科名屈殺漁陽老
章甫何人不惠丈

兒戲將軍百不知枉將壁壘付安危論功纔得鹽山令
堂上奇兵果是誰

堂掾談經見蚤成諸郎難弟復難兄長留北海文章在

千古雲麾有姓名

贈訾子野高士三章

仙翁高弟獨君優
胸次清明辨九流
我是愚溪一愚叟
不妨同醉訾家洲

月旦今誰許與陳
乍賢乍佞日紛紜
鳶肩燕頤非吾事
一片靈臺欲付君

虛名玉表或礮中
薄命何堪與共功
東國人倫要真識
好將傳與黑頭公

戲相師

珥貂簪筆赴鋤犁何必人人貫伏犀
胸次九流君自了
看來唯少醉如泥

留贈丹陽王鍊師二章

信得人間比夢間一卮芳酒且開顏
當時笑伴今誰在
詩客淒涼飯潁山

爛醉玄都有舊期百年人事不勝悲
桃花一簇開無主
留著東風與兔葵

避兵陽曲北山之羊谷題石龕

冥鴻正恐絳疑網脫兔不忘投茂林世故驅人真有力
天公困我豈無心

壬子寒食

兒女青紅笑語譁秋千環索響嘔啞今年好箇明寒食
五樹來禽恰放花

為闕子釀金二首

明珠評價敵連城棄擲泥塗意未平十萬人家管弦裏

獨憐金石隱商聲

秋來聞說酒杯疎却為窮愁解著書知是還山亭上客
無衣無褐欲何如

李子範生子

六峯靈氣未消沉雛鳳翩翩翠作衿名姓定知書小錄
作詩先與喚瓊林

柏鄉光武廟

老樹剗心不更春當年曾見漢儀新憑君莫話春陵事

笑殺中原逐鹿人

和德新丈

三年老眼暗兵塵今日逢君喜事新
結伴還鄉有成約
不應先作北歸人

春日寓興

雨過橫塘水滿堤
亂山高下路東西
一番桃李花開盡
惟有青青草色齊

滄浪圖

萬頃烟波入夢頻
眼中魚鳥覺情親
而今塵滿西風扇
愧爾青山獨往人

浩然雪行圖

曲江花柳自升平
雪礪冰橋去國情
枉却卷中留好語
畫師寒乞可憐生

岳邦獻壽

見君誰不愛清醇
壽席今年樂事新
八十老翁持酒勸
酣歌一曲太平春

風柳歸牛圖

為張伯英賦

陂塘渺渺綠楊風
牛背升平萬古同
忽見畫圖還自笑
枉將書策課兒童

子和麋鹿圖

白髮刁騷一秃翁
塵埃無處避西風
野麋山鹿平生伴
惆悵相看是畫中

賈氏怡齋二首

兒女青紅薦壽觴
階庭蘭玉立諸郎
黃金甲第知何限

誰有怡齋致樂堂

一門難弟復難兄籍甚州閭月旦評見說病中王處士

感君魚有急難情

王敦夫寒病勞復歷兩月之久委頓殊甚仲德躬自調護迄於平善州里

稱焉故

有上句

與西僧婁博克達二首

行雲孤鶴萬緣輕遙見鄉關眼便明不似遺山元老子

塵埃風雨過平生

半世秦川在夢中幾時蓮社與君同淵明自比吾何敢

或有新詩及遠公

附堯山堂外紀元遺山有錦機集指授學者晚年力以國史為已任乃搆野史亭於家凡金源君臣言行記錄至百餘萬言書未就而卒高唐閻靜軒復挽之曰蕭寺秋風捲玉荷月明人影共婆娑誰知別後驪駒曲便是先生薤露歌野史夜寒蟲蠹簡錦機春暖鳳停梭祗應前日西州路常使羊曇忍淚過

附堯山堂外紀興定初裕之始以詩文見閒閒
公公為延譽諸公間又五年乃得以科第出公
之門公力為挽之旁有不平者謂公與楊禮部
之美雷御史希顏李內翰欽叔為元氏黨人正
大甲申諸公貢裕之詞科公為監試官以例不
赴院宿一日坐禮曹欽叔從外至誦裕之秦王
破建德降王世充露布公頗為聳動顧座客陳
司諫正叔曰人言我黨元子誠黨之邪

附堯山堂外紀壬辰北渡順天毛正卿楊德秀
祈仙山寺中蘇晉降筆寫詩數十首一詩有百
偽無一真中有義黃醇之句餘詩除酒裏神仙
我五言外多不成語二人初不知晉為何代人
詩為何人作以語元遺山遺山曰余二十六七
時有詩曰西郊一畝宅閉門秋草深牀頭有新
釀意慙成孤斟舉杯謝明月蓬華肯相臨願將
萬古色照我萬古心又去古日已遠百偽無一

真獨餘酒鄉地中有義黃醇聖教難為功乃見酒
力神誰能釀滄海盡醉區中民今晉所批乃
有此十字晉宣余前身邪將近時鬼物之不昧
者記余詩託名於晉以自神也晉既以余詩為
渠所作余亦就酒裏神仙我五言取償於晉因
作樂府曰繡佛長齋枉伴蒲團過酒壚橫臥一
蹴虛空破頗笑張顛自謂無人和還知麼醉鄉
天大少箇神仙我

附郝經元遺山真贊云其才清以新其氣夷以
春其中和以仁其志忠以勤不啻蔡辛與坡谷
為隣歌謠慷慨喜氣津津唾玉噴珠看花飲醇
而乃熱香讀易坐席凝塵假邪真邪嗚呼復幾
千年更有茲人也耶又遺山銘云士子賈扶爭
綴緝僥倖寸祿奔走急以為詩文作無益糞壤
擲棄明月璧先生卓犖有異識振筆便入蘇黃
室開闢文源翦荆棘大聲復完全玉擊爛漫長

醉思盈溢瑞錦秋花亂堆積險妬護前喘肝臆
羣犬號號共讒疾塵埃野馬為鬼域遺山巖巖
倚天壁

附庶齋老學叢談張橘軒與元遺山為斯文骨
肉張云富貴倘來良有命才名如此豈長貧元
改倘來為逼人此為子又云半篙溪水夜來雨
一樹早梅何處春元曰佳則佳矣而有未安既
曰一樹烏得為何處耶不如將一樹二字改為

幾點壬辰北渡寄遺山詩萬里相逢真是夢百
年垂老更何鄉元改里為死垂為歸如光弼臨
軍旗幟不易一號令之而百倍精采

神川遜士劉祁

九首

補祁字京叔渾源人弱冠舉金進士廷試失意
即閉戶讀書間出古賦雜說數篇李屏山趙閒
閒楊吏部雷御史王滹南諸公見之曰異才也
皆倒屣出迎交口譽之壬辰北還鄉里躬耕自

給築室牘曰歸潛戊戌詔試儒人祁就試魁西
京選充山西東路考試官征南行臺鉅祜祿瑋聞
其名邀至相下待以賓友凡七年而歿年四十
八京叔好三蘇文為學能自刻厲文章議論粹
然一出於正有神川遯士集二十卷處言四十
三篇歸潛志三卷

補歸潛志余高祖南山翁金國初闢進士舉詞
賦狀元也故為一代詞學宗雅好成就後進見

其天輒能斷其後中第石當時名士大夫多出
門下學者至今皆師尊之四子長西巖次龍泉
同年擢第二女長姑及笄將適人一時貴顯者
爭求之翁皆不許張御史景仁時在布衣以所
業詣翁翁嘉之俄而與為有司取士張賦甚佳
為隣坐者剝之盡坐同而黜已而翁知其然遽
以長姑嫁焉家人輩愠翁不恤也後三年翁復
為有司御試張擢別試魁驟歷清華以文章擅

當世位至翰林院學士河南郡御史大夫嘗使
宋有風節赫然為名臣世皆以翁有知人之鑒
也後翁墓表張所作具載其事云次姑適襄陽
王元節亦名進士能詩傳學嘗為密州節度判
官迄今士大夫嫁女多談公之事也

附祁歸潛堂記劉子朔方人生於雲中之渾源
山水之間齠髫從父祖任宦大河之南初知誦
讀屬偶為童子學少長習時文為科舉計然亦

時時閱古今詞章竊讀史書覽古今成敗治亂
慨然有功名心未冠計偕試開封禮部中之及
庭而落於是始大發憤以著述自力頗為先達
諸公所知又結交當世豪傑未有不與以文字
往還者舊有田淮水之陽春夏在陳視耕穫秋
冬必入汴避亂且從諸公講學已而先大夫下
世遂經紀家事然讀書為文亦未嘗少休閒四
方交遊來把酒論文談笑連日夕或留之旬月

不令去時雖少年未遂其進取心而會友著書
亦自樂無歎豈知一旦時移事變流離兵革生
資蕩然童僕散盡從行惟骨肉數口舊書一囊
由銅壺過燕山入武川幾一載始得還鄉里鄉
帥高侯為築室以居所居蓋其故宅之北四面
皆見山若南山西巖吾祖舊遊東為柏山代北
名利西則玉泉龍山山西勝處故朝嵐夕靄千
態萬狀其雲烟吞吐變化窓戶間門前流水數

支每靜夜微風有聲琅琅使人神清不寐劉子
每居室中焚香一炷置筆硯楮墨几上書數卷
偃息嘯歌起望山光臥味道腴為終日樂雖做
衣惡食不知也閒嘗自念生而為儒忝學聖人
之道其平昔所志修身治國平天下窮理盡性
至於命進則以斯道濟當時退則以斯道覺後
世今當壯歲遭此大變更賴先人之靈得返鄉
里幸而有居以自容將默卷靜學以休息其心

力況世路方艱未可為進取謀因榜其堂曰歸
潛且以張橫渠東西二銘書諸壁客有過而詰
之曰今吾子生當茲世正英雄奮發之秋大而
可以分疆據土奉王命為諸侯下而可以附雄
藩巨鎮馳騁才猷謀取富貴或如終童請長纓
入越羈其王致北闕下以功名著不然當效蘇
季子司馬長卿以文詞談說干人主六印駟馬
耀鄉俗吾子奚獨韜光晦迹甘為棄物於一時

使平日所學眇不見鋒鏃亦鄙陋之甚也劉子
曰噫若亦不聞夫君子之道乎蓋君子之道以
時卷舒得其時而不進為固失其時而進為狂
且先顧其內之所有何如亦不在夫外也若平
生苦學豈將徒老焉顧自鬻自求賢者所恥加
之新罹蹇難始欲自脩且將掃除吾先祖丘墓
果其後日為時所用亦安肯不致吾君澤吾民
如或不然雖終身潛可也易曰龍德而隱遯世

無悶傳曰君子若鳳治則見亂則隱吾雖非聖
賢亦安敢不學乎若非知吾之志者也客旣去
遂書於堂以記之且歌曰南山漠漠兮渾水洋
洋桂椒葱蔚兮松柏蒼蒼清泉漏其下兮白石
皦以如霜兕豹踰伏兮鸞鳳翩其來翔世溷濁
而不照兮蹇羝騁夫先路荆榛翁以蒙達兮野
從橫其豺虎矧余志之夙迂兮子罕罕而疇伍
歸歟歸歟其潛於南山之下又歌曰潛於農執

之侶兮潛於漁望之徒兮顧惟不肖豈敢與俱
兮惟茲有堂有琴有書兮學其所不知求進於
聖途兮潛乎潛乎亦可以為娛兮嘻

附元陳時可歸潛堂記潛之為言隱也古之所
謂隱君子者無江海而閒不山林而幽蓋藏器
待時樂天知命不潛而潛者也吾京叔之文之
行有不可掩者而以歸潛名所居堂第恐欲潛
而不得耳且吾聞之易曰君子之道或出或處

或默或語應處而出非道應出而處亦非道語
默何異哉夫魚不厭深矣龍德則不然升潛以
其時孔子聖之時者也乃所願則學孔子子謂
顏淵曰用之則行舍之則藏其論逸民則曰我
則異於是無可無不可艮止也聖人象是卦曰
時止則止時行則行動靜不失其時其道光明
莊周陽擠陰助者也至其舉養生之道亦引仲
尼曰無入而藏無出而陽柴立其中央豈有吾

聖門弟子反專於潛之一字者邪京叔以書求
名老夫告京叔能勿忘乎謹為銘曰仲尼駐車
蟻丘漿宜僚陸沉於其旁夫妻臣妾登屋梁李
路往視渠以亡但見虛室依賴牆古人潛德不
欲出那用此字書其堂況君年甫三十強撐腸
拄腹經傳香文氣渾爾詩筆昌戶外屨滿名飛
揚吾恐自此饒薦章遠來乞銘何可當拈出聖
語吾頗長用之則行舍則藏無入而藏出則陽

得時忌作天際翔
勿以深眇賢庚桑
歸歟歸歟
且和光銘哉銘哉
幸無忘

古意二首

庭前有桂樹
綠葉尚

一作何

離披秋風動
地起飄落

一作零

將安歸
高飛入青雲
下飛入

一作落

汙泥貴賤既偶
爾孰

為喜與悲

秋江有芙蓉
顏色好鮮潔
褰裳欲采折
水深不可涉
嚴風下飛霜
芳艷空凋歇
悵望一長歎
臨川無桂楫

懷長源

涼月夜如水秋風吹紫蘭獨居悵無聊佳人阻河山
河邈千里相望何時已雲橫鴈影沈露下蟲聲起烽火
照中州西南殺氣浮君居劉山下果若向時不人生有
離別但惜知音絕匣內臥青龍一作蛇光芒射秋月汴水
碧參差葉飛空樹枝如何相憶處還值暮秋時

送雷伯威

朔風起天末落木鳴空山冷霜正凝
汴遊子百里還出

郭送將別徘徊上高原如何睽離情對此芳歲闌壯士
志四方不須涕洟瀾人生非山海會面亦不難願子崇
明德餘功振文翰長因東南鴻惠我金玉言

征夫詞

頑陰一作雲漠漠秋天黑冷雨瀟瀟和雪滴塗中騎士衣

裳單半夜銜枚赴靈壁中州近歲雨雪多只因戍馬窺
黃河將軍錦帳衣千襲馬上揮鞭傳令急但令飽暖度
朝夕一死沙場吾不惜九重日望凱歌歸安知中路行

逶迤願將舞女纏頭錦添作征人身上衣

征婦詞

青燈熒熒照空壁綺窓月上莎雞泣良人塞上一作沙塞遠

從軍獨妾深閨長太息憶初癡小嫁君時謂君不晚擁
旌麾如何十載尚輿隸東屯西戍長奔馳秋風戎馬臨
關路千里持矛闕上去公家事急將令嚴兒女私情那
得顧恨妾不為金韉鞍在君腰下隨風埃恨妾不為龍
泉劍在君手內飛光燄慕君不得逐君行翠袖斑斕空

血染君不見重瞳鳳駕遊九嶷蒼梧望斷猶不歸況今
沙場征戰地千人同去幾人回君回不回俱未見妾心
如石那可轉

留春曲

絮飛冷屑龍蟠玉花殞香摧鳳銜燭批頰深林叫新綠
倚闌人唱留春曲春光欲去如死灰明年暖風吹又來
何如日日長相守典衣共醉花前杯殷勤留春春不住
白日西馳水東注鏡中絲髮奈老何君當持杯我欲歌

南京遇仙樓

倚天突兀聳高樓樓上人家白玉鉤落日笙歌迷汴水
春風燈火似揚州仙人已去名空在豪客同來醉未休
獨倚朱闌望明月鸞旌依約認重游

過陳司諫墓

鑿坡烏府舊遊空三尺孤墳野寺中猶有憂時心不死
墓門昨夜起秋風



御訂全金詩增補中州集卷七十二